

Green Education Symposium kier educa hobennan pa

Crea un Aruba menos dependiente di importacion di cuminda



ORANJESTAD (AAN): Den presencia di casi 500 estudiante y docente a inicia dialuna mainta na Cas di Cultura e di tres Green Education Symposium organisa door di Biblioteca Nacional. Esaki a tuma luga den cooperacion cu WEB Aruba NV, SETAR, ELMAR, Santa Rosa y oficina di Innovacion di Ministerio di Asuntonan General di Gabinete Mike Eman II. E studiantenan invita pa e prome dia di presentacion, cu lo tuma luga henter e siman aki pa diferente scol, tabata

di La Salle College, Filomena College, Colegio Arubano y IPA.

Cada dia e siman aki lo tin un otro Minister invita pa duna un mensahe di sostenibilidad na e studiantenan. E biaha aki a toca na Minister di Enseñansa, Educacion Adulto y Asuntonan di Famia pa habri e prome mainta, recordando e hobennan riba e importancia pa pensa riba sostenibilidad pa tin un miho mundo mañan. “Si bo kier un aña di prosperidad, planta un simia, si bo kier 10 aña di

prosperidad, planta mata, si bo kier 100 aña di prosperidad, educa bo hendenan,” ta un dicho Chines cu e mandatario a cera su discurso cu ne.


Tema cu organisadonan a scoge e aña “ki pa educa e hobennan riba dje tabata “Cuminda cosecha den forma sostenibel pa Aruba”.

E mainta a pasa varios video di e forma con antes e hendenan tabata yega na nan cuminda, cu Aruba ta importa gran mayoria di su cumindanan y cu e caminda pa sigui ta pa Aruba yega na por lo menos un produccion di 20% di loke ta e necesidad local, pa aña 2020.

Sra. Natalie Maduro di Santa Rosa a mostra con a cambia e imagen di Santa Rosa cu a bira mas activo den promove agricultura, cria y pesca, proveyendo e hermentnan cu e personanan cu ta dedica nan mes na esaki mester di nan. Por ehempel, door di segura mester busca posnan cu awa cu por wordo uza pa muha mata, awa di sceptic tank ta wordo procesa y bira adecuado pa uza tambe pa matanan y recientemente a adkiri un sistema moderno cu ta haci e awa adecuado segun standardnan internacional. Tur esaki pa cumpli cu e meta di Gabinete Mike Eman pa Aruba ta mas sostenibel.

Tambe por a mira un video di e proyecto na Kudawecha Scol Basico cu su proyecto Grooms Pilot Project” unda studiantenan a siña planta mata di berdura cu despues nan mes a uza pa haci cuminda, igualmente tin e ehempel di EPB Santa Cruz cu tin un proyecto di Greenhouse den desaroyo y via cual ta produci matanan tanto di fruta como berdura cu ta wordo bendi cu publico na Santa Rosa.

Un proyecto cu hopi estudiante no tabata na altura di dje tabata esun di Pesca Sostenibel.



Taino Heinze a splica cu no ta e piscado chikito ta e problema cu escasez di pesca rond mundo, pero esnan cu a haci di esaki un industria, uzando netnan grandi cu ta lastra tur pesca bay cu nan, inclusive e chikitonan. “Apesar cu nan ta wordo tira bek den lama, mayoria ta muri,” Heinze a splica. El a agrega cu “mayoria hende no sa pero gran parti di nos pesca ta wordo importa. Apenas 50 kilo di pesca ta wordo captura

pa dia na Aruba, compara cu 200 kilo di antes.” “Wow”, tabata e reaccion di algun grupo di estudiante.

WEB tambe a duna su contribucion den e Green Education Symposium unda ing. Marc Croes a papia riba e importancia di awa saludabel. “Sin awa saludabel no tin bida,” ing. Croes a pone hopi enfasis riba dje. “Hopi biaha a lubida e balor real di awa,” el a conclui su discurso.